

戚少保年譜耆編

戚少保年譜耆編卷之二

開嗣祚國彙纂

緹嗣昌國集錄

廩嗣報國詳訂

庠嗣興國參校

嘉靖四十年癸酉家嚴三十四歲

春正月定伏路條約

竊惟斥候瞭望兵政所先衛所軍城設濱海際而  
夷情譎詐覆轍可徵往往海洋捉獲漁樵船隻就  
用被擄之人駕船而伏賊其中突然登岸扣關出

我不意及其巢屯昏夜之時密置雲梯窺伺守陴  
倦怠城瞭不明輒行掩襲且各處烽候有置在山  
巔止堪瞭遠而海洋廣港勢脉縈迴目力未能徧  
悉不無意外之虞則於各該衛所設有伏路官軍  
而又廣之以數額者正爲此也今將陸路哨守號  
令軍法合行給發遵守備習如有警不分晝夜責  
其依照舉號走報賊情務使表裏兼制內外咸備  
令賊無隙可乘自足以消奸宄之念而保金湯之  
固矣

春三月出師海上

是月二十八日家嚴創授新製所造戰船四十四隻各已工竣於是祀告海神大賚士卒分布松海二門爲兩關每關福船八艘艫橋八艘海蒼四艘松門關則以指揮胡震總理該哨信地在南則右營哨官葉京等部領兵船十艘哨抵金盤蒲岐所大小門海洋爲界在北則後所千戶張震等部領兵船十艘哨抵新河所深門大陳海洋爲界海門關則以指揮任錦總理該哨信地在南則前營指揮李堂等部領兵船十艘哨抵新河深門大陳海洋爲界在北則指揮李詢等部領兵船十艘哨抵

桃渚所白帶門伎人沙岐爲界中營兵船四艘以指揮沈祿哨官蔣廷菖部領嚴守港口每日隨潮哨至東西基竇門爲界各營仍遞以一軍出洋一軍在港迭相哨守以固海防遇小警則該營兵船徑自相機剿截賊勢重大則各營併踪夾攻便宜進止於是振旅揚帆出薄海外而制度烜赫紀律精明台人駢肩累跡觀者如蟻莫不鼓掌相羨爲創見云先是海中舳艫皆賫價赴閩製造勞費無量家嚴乃建議制府鳩工台州親自督造皆創制也其夜迅雷烈颶雨雹交作東皋烏柏仆木遇擊

直立如生父老異之入告邑侯邑侯入白憲府憲府曰木兆吉始植其神之爲乎此武功振赫兩浙鼎奠之兆也

附福滄艫海蒼船說

夫福船高大如城非人力可驅全仗風勢倭船自來矮小如我之小蒼船故福船乘風下壓如車碾螳螂鬪船力不關人力是以每每取勝但吃水一丈一二尺惟利大洋而無風不可使是以賊舟一入裏海沿淺而行則福船遂爲無用故又有海滄之設海滄稍小喫水七八尺風小亦可動但其功

力非福船比設賊舟大而相竝我舟人力非十分  
膽勇不可勝然二項船只可犁沉賊舟不能撈取  
首級故又有蒼船之設蒼船最小水面上高不過  
五尺就加以木豎柵架亦不過五尺賊舟與之相  
等既勢均不能冲犁若使逕逼賊舟兩艘相聯以  
短兵鬪力我兵決非長策多見悞事但賊舟一入  
裏海我之大福海滄不能入必用蒼船以追之此  
船喫水六七尺與賊舟等其撈取首級最爲快便  
近者改製爲艫艫比蒼船稍大比海滄則小且無  
立壁最爲得中遇倭舟或小或少皆可施功大端

風動勢順則滄不如福蒼不如滄若風小勢逆則  
福不如滄滄不如蒼其開浪網船之類皆可備哨  
探而不可戰也開浪以其頭尖故名而喫水三四  
尺四槳一櫓其形如飛內可住三五十人不拘風  
潮順逆可使又八槳船左右十六槳後一櫓更爲  
飛迅但坐臥處不冠冕耳網船形似織梭內容數  
人前後用二人以棹掉之風浪大又可拖之塗上  
且不能覆止喫水七八寸耳此可走報或用之裏  
港淺洋動以百數每隻內用鳥銃二三人蜂集蟻  
附沿淺沿塗擊賊甚妙但水兵人技皆次於陸兵




設使將水兵教練遴選納之舟中其功倍於陸兵必矣

附兵夫列船式


平時在船四面擺各隊總合爲一大哨於船四面各隊各器長短相間分方面外而立如遇打賊隨賊所在之面併力動手無賊之面亦留每面二人防看其船頭用銃一架第一隊撥兵四名專管船頭閘板下第二隊撥兵四名專管雨水倉門大約以五船爲一艖哨官領之兩哨爲一司分總領之三司二司爲一部主將領之每船大旗俱用黑布

一則便於遠瞭一則合於水性也號帶各照分營  
方色隊旗各照本船號帶方色

# 平時立船閱視圖




# 安擺船式之圖



# 分關二營擺圖



# 一 營 擺 圖



以上擺船之說大端海濤洶湧港有灣曲濶狹當風隱風不同隨港形深淺難拘一定之勢此言處寬迴水善之形耳設使狹如羊腸則又當單隻一字順下不可拘方也今以見在船分之福船二隻海滄船一隻艚船二隻爲一哨立一哨官左右二哨官爲一營立一領兵官以松門關分右後二營海門關分前左二營各以指揮一員統領附兵船束伍法

每福船一隻捕盜一名船工二名繚手二名板招一名上斗一名旋手二名隊長五名每隊兵十名

一二隊俱火器三四五隊俱兵器

第一隊此隊專舉鳥銃 第二隊此隊專舉鳥銃

隊 鳥 鳥 鳥 鳥 鳥

長 銃 銃 銃 銃 銃

第三隊此隊在船以長鎗手四名管浪機二位

第四隊此隊在船以長鎗手四名

第五隊此隊在船以長鎗手四名

隊 牌 長 長 弩

長 手 鎗 鎗 手

箭 火 兼 鎗

每海滄船一隻捕盜一名舵工二名繚手一名旋

手二名板招一名隊長四名兵夫四十名旗色俱

同福船分哨第一隊俱火器二隊三四隊俱兵器

第一隊

此隊專舉鳥銃  
隊長習用火桶

隊 鳥 鳥 鳥 鳥 鳥

長 銃 銃 銃 銃 銃

第二隊

此隊在船以長鎗手四名管狼機二位牌  
手弩手鈚手俱同福船隊長習用火桶

第三隊

此隊在船以長鎗手四名管  
百子銃二位餘同第二隊

第四隊

此隊在船以長鎗手四名  
管狼機二位餘同第二隊

隊 牌 長 長 弩

兼鈚

長 手 鎗 鎗 手

火箭



每艘艦一隻即大蒼山船也捕盜一名舵工一名  
舵手一名繚手一名隊長三名兵夫三十名旗色  
俱同福船分哨第一隊俱火器二隊三隊俱兵器

第一隊此隊專舉鳥銃  
隊長習用火桶

隊 鳥 鳥 鳥 鳥 鳥

長 銃 銃 銃 銃 銃

第二隊此隊在船以長鎗手四名管狼機二位牌  
手弩手鈚手俱同福船隊長習用火桶

隊 牌 長 長 弩 兼鈚

長 手 鎗 鎗 手 火箭

第三隊此隊在船以長鎗手四名管  
百子銃二位餘同第二隊

隊 牌 長 長 弩 兼  
長 手 鎗 鎗 手 箭

以上船隻必擇其第一堅大者爲中軍餘分爲中  
司左司右司每司分二哨船多則加前司後司大  
小相兼或八隊七隊六隊五隊三四隊相船損益  
之如叭喇唬八槳船漁船哨馬之類或爲飛哨或  
用銃箭便於圍遶或二隊或一隊大約不出二十  
名外但鎗手兼習鳥銃耳

請給各兵功賞

竊照本職部下官兵於嘉靖三十八年三四月內

在於台州莊鑑溪章安菖埠海門金清閘南灣等處斬獲真倭首級已查明一百餘級呈奉本部院批布政司將各項原議海防未完銀兩上緊追徵如數解發本官以憑賞給此繳咨煩查候本司通行各紀功官處覆覈的實及候題請覆覈至日照數類解給發等因准此爲照前項斬獲功給之兵皆係烏合召集之衆而所以見敵忘命克成大捷者豈人人皆能無所爲而爲善況肯無所爲而捐軀乎不過冀平時無賊之日多而得那僱工食及至有事出萬一之危途幸十死於一生以獲功賞

歸家度日之計耳今本職等以異方之官司死生之寄敵寇在前斧鉞在後雖奉本部院之威令然軍法殺之而不敢怨不敢變者亦以功賞工食之利其心也故心死於利而職等軍法方行今准布政司同稱待勘者蓋因請給紛紛中間亦有應給不應給之別礙難于言而且計費甚多故槩行此文以杜其請討誠亦爲處變之一機也但功次之重輕斬賊之真僞戰陣之難易勝負之所獲均有不同其至著至明者莫如三十八年本職合營義烏處州海道等部之功今方無事之時畏威而不

敢告莫愚於此輩也他日萬一用力之秋緣此藉口亦莫奸於此輩也再照候勘施行者不過勘地方功罪地方功罪之當勘者職守之官等是也亦於斬級之人無相干涉就或一陣之中苟有失事然失事者將領而不無一二斬級之人亦應與其驗錄況本職受本部院翼覆之恩誓以涓埃之報亦曾簡次備述下情呈奉嚴諭批給者數矣今復直陳再稟似涉摭飾重詞而不知眾心之大機全係功賞之酬勸今隱避而不言萬一少有不効他日臨事言之寔不能辭要請之嫌而不若及今詳

請之爲得也

呈請清理軍丁戶籍

本職於三十九年條請專任所屬沿海衛所事宜緣由蒙巡按御史周批所議有見且中時槃因以見本參據忠殫慮與碌碌者不侔但更張有漸上下乃孚若外至之言決不能損真亦不必過防也又蒙總督軍門胡批據條陳數款深爲有見且切中時弊本官爲一方大將旣肯挺身任一方軍務悉以委託許便宜施行若事體重大必須公議亦聽會同兵巡道斟酌計議而行具由詳報案照先

該本職查得所屬境內舊係鹽紹台參將遙制整  
飾兵備亦係兵巡道兼攝而又更換不常是以自  
三十一年倭患以來無次不犯台州地方且沿海  
一帶上接吳越下聯甌閩而竟爲賊盜淵藪出沒  
經由之路往年坐此疎虞近奉部院特爲題設兵  
備參將遂將本職誤充任使猥見衛所狼狽行伍  
煎銷不揣駑駘志大才小力綿任重欲期一旦創  
起此二百年之積廢逐一施行次第修舉隨機鼓  
舞因事用權多方比併招撫逃丁招徠缺伍軍士  
秋冬之間松新楚隘一衛三所招回別省投兵貧

流出外官豪占役等項軍舍餘丁已經千有餘人  
充補行伍訖十一月于海門衛查點旗軍左等四  
衛原設官軍六千五百二十八員名今見存官軍  
止一千一百八十三員名況十無五六精壯又加  
中所百戶伍內原額一百一十三戶今存者止老  
軍二戶則沿海衛所是獨海門行伍空虛爲極又  
以其險要言之則海口橫濶十里港流亘浸直至  
內地二十里分流一脈徑抵台州府城下一脈徑  
抵黃巖縣城下港外乘風一潮可到則沿海之勢  
是獨海門港爲衝以城垣形勢言之北枕大港東



近海潮西控巨村賊舟可泊南面羣山駢肩內視  
南城俯窺山麓矢石自上而下規模險陋皆無足  
恃則沿海之賊是獨海門城守爲難以城中武備  
言之其沿海他處衛所軍容雖廢而官法尚行一  
二惟該衛軍豪官弱專寄乏人號令寸步難行則  
沿海之武備是獨海門廢弛爲甚以官軍言之諸  
衛所官軍貧富相等禮義可興恒心可作尙知顧  
戀信義惟該衛官少軍貧室廬不蔽風雨人心無  
恒則沿海官軍是獨海門振作爲難況海門係台  
黃門戶腹裏藩籬且逼近大海而賊舟時刻可到

城大人寡兵家所忌本職部下雖有陸兵一枝原該隨賊向往攻剿似難砲繫城守隨該究原其故蓋以該衛所旗軍多係溫台溫紹四府之人去籍最近既得以遂歸往之志而餘丁近家復可資而隱之且管軍千百戶等官利其籍近徑至各軍之家更易行伍顛倒埋沒之奸無所不施故行伍空虛至此者由其原籍之近也而爲今日足軍之望者則又有賴於原籍之近焉蓋惟籍之近故所伍尤能知因原籍難以展轉且所幸台溫溫紹皆同省接境兵備府縣又皆本部院親臨卽台州一府

之籍皆本管兵巡道所自駐之地設若嚴督各所  
伍官着寔開具真正行伍籍貫就聽兵巡道嚴督  
府縣查明軍官逐一清解則一府朞月可得千餘  
況兵巡道爲切已之憂當盡法督程而在府縣有  
司奉本道之令斷不敢視爲不急之務其台溫甯  
紹鄰境之地皆爲同省管轄就以本道督之軍不就  
不奉令惟謹設行各本管兵巡等道必以同軍和  
體亦可得十分之半夫軍城之空虛者固莫憊於  
海門衛而軍戶之在籍易於清查勾補充寔行伍  
者亦莫易於海門衛除本職一面嚴督該衛所官

役嚴限多方勒令將隱役旗軍凡軍官可以自爲者定爲三限清招外其果是逃埋在籍事屬有司非武官才力職守勘爲者備造缺伍文冊每府一帙合無將前項文冊批行各兵巡道轉行各府縣清軍官着寔挨查務在夏秋之間立爲分數勒限清解到官解衛取印信及發編操伍緣由繳報務俾有益於戰守則孤城有備永保無虞而籬藩旣固則堂奧自安矣

呈議預備松海二衛軍餉

竊照戰守機宜惟在行伍充實而固本先圖又在

足食示信故糧餉裕而士氣銳倉廩盈而武備修  
且松海二衛六所皆臨海要衝賊舟時刻可到況  
今風汎方深旗軍丁舍俱已編派城梁仍復備開  
方略行令着寔舉行目今正法嚴令密之時而倉  
廩乃爾空虛無從贍給萬一倭寇突臨安能枵腹  
乘守此在今日所當亟爲預備者也

夏四月島夷肆掠台州分督新練兵連捷於寺前橋  
花街等處大殄滅之

是年綿花果島夷自季春鳩眾二千餘徒聚舟五  
十餘艘潛泊甯紹外海覘我虛實是月十二日辛

丑家嚴督舟師出哨賊知有備望風開遁遂班師  
同巡道唐公駐松門留所部一軍爲防十九日戊  
申雷海西店有烏嘴夷船十六艘一時交集停泊  
象山海口東塔旣而從奉化之西鳳登岸日暮突  
至一都團前蹂躪郊班勢甚熾闕其所以特犯雷  
奉間者蓋先以數舟爲餌計欲牽制松海諸軍而  
後以多舟肆犯比家嚴預識此機乃以把總樓楠  
指揮劉意等部一軍守台州以百戶胡守仁張元  
勲等部一軍以防海門廿二日昧爽鞠旅啟行唐  
公郊醕之曰島夷睥睨台州先發雷海欲以走我

兵耳兵出賊乘虛而入奈何家嚴曰吾先已留一  
軍軍海門居中爲應遂整隊進兵徑趨霍海兵旣  
出至兩頭門二十三日壬子日未中賊果大來聯  
舟數十餘艘衆盈數千由大城潛揚帆直入大荆  
襲下裏浦延犯桃渚其夜復分流七百餘徒突至  
海港舍楚隘由坭澳潛抵下洋梁次日徑犯新河  
北潭四境騷動時家慈居新河精壯悉從征人心  
洶洶手足無措家慈乃命開兵甲火藥之藏守者  
難之曰無將軍令誰敢擅動封鑰家慈曰事急矣  
吾自任之於是令城守士卒及婦女悉假兵裝布

列城上旌旗叢密銃喊齊聞賊懸望之疑有備不敢逼城時唐公將留海門者宣言曰賊薄新河剽甚不亟擊將爲戚將軍妻子憂因馳書會盟于白嶠家嚴乃令樓楠胡守仁等發兵趨新河會戰且馳書于唐曰雷海眾新河寡吾自將擊雷海以樓胡二部援新河也唐公得書乃督所遣部兵自黃巖乘舟由海門登岸時賊方肆掠未及作食猝遇之新河城下卽鼓譟大戰我兵銳甚賊莫能當乃敗匿寺前橋鮑主簿宅唐公乃申家嚴方畧以樓楠胡守仁等爲中軍正兵劉意等爲右哨張元勳



等爲左哨臨海典史韋全等分役督陣太平令徐  
鉞黃巖令張思善等率鄉兵爲策應主簿丁滿運  
餉於後乃分列大路按陣以待日晡賊始布陣出  
巢迎敵肆攻所城我兵壯士王傑朱廷玘方其等  
挺身當鋒首梟二賊賊潰乃大破之計斬首二十  
九級奪獲器仗弓矢百七十九件餘孽投巢固守  
其巢房高壁固石門僅容三四人諸技不得施惟  
數以鳥銃彈射之死者百餘賊卽毀門屏自焚不  
以首貽我兵百總蔡十單身殺入連刃二賊身亦  
被傷相拒至暮賊窮甚會兵皆枵腹乃撤入城是

月二十六日乙卯也巢中餘黨乘兵退卽夜遯鐵  
場走温州次日樓胡等領兵兼程追及溫嶺圍於  
新塘又破之計斬馘八十餘級奪獲器械一百七  
十有奇我兵陣亡者姜金等三人也殘寇殊死走  
樂清會大霧咫尺不辨乃還兵新河時家嚴宿梁  
王舖夜寐肌肉輒動乃急起卜諸幕吏陳文治對  
曰噫嘻茲卜也一何奇也夫寇之西其誘我也雖  
眾無所用之意常有事於台請成軍而南其必濟  
乎梁王距留海止一舍無回兵之理再卜仍如前  
遂於次辰發兵會唐公以書來報曰僕幸破賊係

新河究獨登桃渚者已焚舟南流矣度此時將及  
精進寺去我兵遠難與爭安危之主也敢不惟命  
是從因抵掌奮勇莫不棄食以從而朱珏慨然以  
必勝自任家嚴乃麾旄肅陣援枹鼓師以領兵官  
丁邦彥哨官景良忠等兵爲前鋒左哨兼左伏左  
奇義士趙幽甫佐之由大路進領兵官陳大成哨  
官王如龍等兵爲前鋒右哨兼右伏右奇中軍哨  
官王輔佐之由江下進中軍把總陳濠胡大受爲  
中哨正兵中軍哨官趙記孫廷賢爲左右翼由二  
兵之後郡守王公可大督民兵列陣壕邊以爲聲

援師成鼓行而進至花街去自植柏木不一里遇賊其一酋乘輿持矛輪雙刃導前隊諸寇爲一字大陣以迎家嚴卽舉礮出前鋒更列鳥火欵彈爍鉛飛而却敵諸兵遂擁隊前攻一渠賊左挾矛右挾刃嘗我軍家嚴出所服銀鎧約值二百金乃標以諭衆曰有能首梟此賊卽以此鎧酬之爲首功勸壯士朱珏應聲而出攘臂直冲一銃折其矛再擊折刃取其首復連刃七賊賊負極乃分右哨迎敵我兵之左哨把總丁邦彥哨官陳文遠金明亮景良忠及哨長丁茂樓集等敵之賊又分左哨迎

敵我兵之右哨把總陳大成哨官陳子鑾吳惟忠  
王如龍及哨長楊世潮楊文通等敵之於時旗鼓  
相生奇伏齊出因敵措勝指顧風雲世潮則奮勇  
徂擊樓集乃揮金不顧諸寇驚愕曰是何神耶遂  
披靡大潰我兵仍頡頏部伍利頗爲督兵回剿家  
嚴因計賊不屯而南此捕鹿者欲據其穴耳況精  
進寺係三台大徑賊勢及此意在乘虛侵犯府城  
遂決意轉甯海而馳赴台城又出賊之意外矣時  
圍前之賊亦以家嚴且來反舟遁去是夜我師趨  
桐巖嶺兵皆絕粒緣所資之糧止三日而今已五

浹辰矣抵暮又命文治卜戰則斷以明日日中大  
戰大克當陣亡者三人家嚴計桐巖去台七十里  
而桃渚去台百八十里勢難相及以所言爲誑而  
文治執之愈堅乃於二十七日丙辰昧旦部兵自  
桐巖疾趨台州期入城中會食至日中兵行七十  
里不得食守吏方戒城守毋納諸將兵兵爭門而  
罵賊且近家嚴後至佯怒曰若等反耶賊已薄城  
下若叱守者爭入城卽守者以狀聞無死所矣軍  
中語曰守者謂乃公怯耶亟須滅賊而後會食台  
守王公乃發粟於城外大兵方炊遽報賊至時台

城久雨多傾圯又因議建敵臺折毀二十餘處未修兼兵將俱出賊潛布奸細偵得其虛欲掩襲之故賊皆偃旗息號疾奔期入台城會食居民惴惴思提挈以逃家嚴甫及城而賊已突入靖江山下潛抵花街距城二里乃呼眾諭以大義且激以噪囂狀而曰汝今叢怨於我我其謝汝等以安守者不則憎茲多口其何說之辭諸將士皆下馬羅拜曰將軍吾等之司命國家之干城誰敢怨乃張兩翼而逐之陳大成等追賊左哨直至瓜鄰江下賊盡汨沉波底丁邦彥等追北四十餘里直至新橋

擠落港渠橋水幾斷流隨路五戰五勝二路共斬  
首三百八級生擒巨酋二俘其漂溺無算鹵獲器  
仗弓矢六百五十有奇釋係累男婦五千餘人大  
獲全勝我兵陣亡者哨長陳文清三人而已先丁  
邦彥已入城聞令迎敵城閉不得出遂躍牆而下  
步戰三十里是戰也得之先算故徑遏其趨且瞧  
類無餘鳥人作氣自此捷始比凱旋火兵之炊方  
熟且軍中恍見赭衣神人炫耀於前土人異之私  
相賀曰有是哉用兵之神也枯木自植正兆機於  
此共大將成功之驗乎二十七日又倭舟七艘流



泊深門海洋該汎官兵追擊之及浪烏海洋犁沉  
一舟計擒斬九夷殘孽各負命而遁

五月島夷大掠台州之白水楚門等處水陸九捷而  
平

先是孟夏二十五日甲寅島夷駕舟十八帆載眾  
二千餘徒泊健跳所之圻頭至二十八日丁巳焚  
舟登岸南掠犯臨海遂於仲夏一日抵台東之大  
田家嚴計曰賊南突必犯府城乃先令樓楠等將  
五百人往屯隘頑以防惟畱丁邦彥陳大成兩部  
及陳濠胡大受等所將親兵千五百人待命中軍

厚加賞賚以勵之又令縣尹趙公諭眾以父母赤子之義兵皆踴躍因誓師曰往戰以眾今以寡願與若等約者三毋尙首功無掠輜重毋輕刃脅從前驅者連擊賊無畱行後伍取級畢而獻狀獲賊首五百予前驅者千金七百倍之千又倍之所得輜重徧賜軍中賊未破爭取財者罪死軍中立一白幟爲信凡脅從空手伏幟下悉放還毋爲賊樹黨也是月庚申朔夜月角有星如鶉赤氣氤氲於城上占者以爲兵勝之氣是日遂陳師而往日未中抵大田嶺逼賊賊設伏我亦設伏待之兩鋒方

值會大雨如注不戰而解然賊亦不敢侵犯府城  
乃乘雨從間道退次大田中渡按伏竟日初三日  
壬戌賊循山路遁大石欲自仙居竊窺處州家嚴  
度賊從中渡過水突仙居必由裡路趨上峰山出  
白水洋七十里而遠我兵出大道至白水洋五十  
里而近乃引兵伏上峰山先處戰地以逸待勞恐  
露吾兵因令各斬一松執之人影其身遠視儼如  
叢林復以哨官趙記領所部塘兵或迎賊前或尾  
賊後分偵向往初四日癸亥賊果冒雨由山路整  
隊趨坐居黎壓內地且三步一賊盈二千眾長二

十里旗幟聯雲戈矛閃日仍以被擄男婦伏麥田  
爲應初五日甲子過上峰嶺賊瞭嶺頭皆叢林不  
見有兵及賊過且半我兵棄松而起銃喊突發乘  
高奮擊賊之前隊方欲駐炊山下見兵起卽回首  
對壘時把總陳大成爲前鋒哨官陳子鑾王如龍  
爲左右翼陳京童子明爲後應家嚴仍出銀壺錦  
帛爲沖鋒賞於時陣列鴛鴦勢成臂指一鼓而前  
賊大敗遁據小山會哨官丁邦彥率部兵由裏路  
徑擣山下遂各隊掩擊之賊逆鬪不利復走奔大  
山比已出白幟立北山下傳令颺言脅從良民投

旗避命四散者數百人我兵鼓銳前驅賊不能支  
旬間而登重山搶上界嶺其嶺峻削如柱頂雖橫  
廣旁止一徑可通非攀援魚貫則必失步于是哨  
官婁子和帥諸壯士婁信一婁虎王典朱珏陳祿  
楊文通郭十三等斬關直上哨官吳惟忠陳文遠  
景良忠朱九龍金鳴亮等相繼而登賊恃高攻下  
據險拒我我兵覆楯仰擊夾以長矛賊下捍者爲  
長矛截落巖下持楯者奮躍爭先大眾蜂擁而上  
賊悉眾前拒復北不勝狼狽四墜死者無算殘寇  
攀巖復下殊死走白水洋羣匪朱氏大家我兵乘

勝下山圍之數匝四面舉火趙幽甫復率烏銃攻之遂折牆而擊賊亦乘屋施銃瓦爲敵我兵竟逼屋下擲藥焚廬賊沖突不出我兵進箠掃之賊復以僵屍缺刃搏躍陣前我兵銃箠層刻一格而落賊負極至有捧銀跪授獻級求免者兵皆併力克敵其魁級金橐俱任燬不顧賊於是或自殺或投火巢覆穴空克成全勝火燼屍積充雷是役也三戰三捷計斬首三百四十四級生擒五酋釋俘攜男婦千有餘衆鹵獲器仗一千四百九十有奇比時當鋒首功者楊世潮等陣亡者陳四等三人也

初六日乙丑凱旋城頭赤氣如煙雲繚繞台民矚目者駢肩二十餘里歡聲雷動僉謂戚公生我真時雨師也兵備唐公捷報略云忠信廉潔三軍樂與同懷果敢英明八面俱堪應敵赴甯海目無內顧毅然絕裾之風宿梁王身據必爭屹矣長城之峙以疲寡而大捷俄頃一卒不損當險厄而紛登如坦萬俘生還皆由威信交孚不蹈時弊故能因敵變化而尤巧於速也雖古名將何能竝之以上數戰兵德有五不顧首級直殺無前以求全勝一也揮金不顧賊不能餌二也俘係之人揮之使去

三也圍焚方戰財級聽其然燬四也三軍一心不  
爽軍令五也東南土著之兵信無出其右矣是月  
十一日庚午楚門漩夷舟十餘艘繫泊江干內一  
舟先登犯梅島約賊二十人遂行令松門關領兵  
指揮胡震督發水兵伏候外洋隨遣把總樓楠領  
陸兵一旅於十三日壬申追及洋坑冒雨交鋒大  
破之計生擒二賊斬級一十有三餘賊俱奔水漂  
溺在海賊舟望風開遁行至長帛海洋爲胡震兵  
進及游門犁沉五艘燒殘五艘至夜賊拖殘船出  
海又犁沉其四漂沒甚衆生擒二賊斬首二十一



級釋俘男婦五十餘人鹵獲器仗百七十有奇十四日癸酉餘賊遁至沙鑊海洋我兵追及又犁其四艘賊奔仰月沙匿懸山爲藩蔽我兵用三板哨船載弩銃手潛伏澳口扼敵咽喉偃旗待之夜半賊乘雨霧潛奔我兵舉旗電發犁沉一艘獲首四級餘賊不支復回懸山我兵以舟師環守賊不得遁乃於五鼓由淺塗渡洋登老岸肆寇林頭家巖時在隘頭聞報遂親督樓楠等兵迎其前中軍胡守仁佐之以把總劉意由聶土橋躡擊其後千總宣淮佐之而仍以通判吳公成器馳新河趨督把

總陳大成丁邦彥等二部爲策應以知縣徐公鉞督鄉兵於藤嶺以截沖突內地省祭沈賓佐之令下三路進圍夾擊賊遂遁小藤嶺據民居以角我兵於是舉火燬屋賊復出逆戰不利走大藤嶺時日已暮會通判吳公部陳大成等兵至願一當賊鋒乃分遣部將先後之吳躍馬馳賊賊輕軍一持矛者從吳矛及馬腹吳引弓射却大兵四至一鼓進剿除焚溺不計斬首三十有六級十六日乙亥胡震搜懸山又斬一級十七日丙子甯海團前遁賊聚眾三千聯艦數十因過隘頑爲兵舟所迫不

能遠去乃復登長沙岸伐竹刊木繭壘結巢欲南  
攻隘頑北襲太平爲久住計仍以所掠象奉泰甯  
子女附舟於巢髡首跣足定擬次年歸國比時家  
嚴在新河聞報卽會通判吳公知縣趙公計云賊  
巢逼近隘頑孤城狼狽旦夕難保宜急進兵況長  
沙北阨太平路于小藤嶺東阨松門路於漫遊嶺  
南逼楚門于隘頑嶺一所孤懸路絕止有水路一  
面可浮海而援乃潛令把總李誠立單騎馳赴松  
門命千戶羅繼祖分駕小船載壯士乘夜浮海入  
隘頑協守十八日大兵至鐵場雨甚兵不得幕家

嚴自撤其蓋巡行以勞之十九日會有自夷中逃  
來者云舟中係累千餘目望將軍若雲霓家嚴乃  
召集諸將授以方畧戒以毋取財貨毋貪首功因  
仰天祝曰被擄子女皆吾類也圍無俘馘功惟祈  
救此生靈足矣甚勿妄殺且禁火攻士卒無不感  
奮泣下者於是分布諸將以把總陳大成將中軍  
爲正兵孫廷賢等佐之把總丁邦彥將左翼沈賓  
等佐之把總樓楠將右翼胡守仁等佐之通判吳  
公將奇兵武生田大有等佐之是爲陸師以百戶  
陳濠爲邀擊胡大受等佐之以指揮胡震爲犄角

張元勳等佐之是爲水部哨官趙記爲遊兵宣淮等佐之往來督戰次辰二十日鷄鳴進次小亭分三路偃旗懸鼓直薄賊所鼓譟而進賊不虞兵至相視股慄迎鬪不勝爭赴舟舟已預遣奇兵焚之賊乃遁入海塗會烈颶揚波潮水澎湃遂皆蹈海漂溺餘黨悉平生俘亍酋擒斬羣醜五十有六卒如所祈釋繫累子女千二百有奇各聽自散其幼弱婦女無歸者尙七十餘人盡收入隘頒給衣食出示親屬認領奪獲器仗三千二百四十有奇倭舟一十有一艘輜重財貨不可勝計悉散爲將士

犒分毫無取當兵舍鐵場時夜雨如注唐公露禱  
曰夫人勞苦功高或有不承者願以未盡之年益  
之及告捷唐公仰天笑曰賊將軍活人多無用予  
年爲也先是賊分三百餘人出劫聞其黨盡殲遂  
乘夜潛夥入海相向大哭駕焦舟十艘開遁二十  
一日庚辰爲胡震督舟師追及洋岐下洋犁舟二  
艘焚溺甚衆斬首五級我兵陣亡百戶焦經等三  
人哨官鄭方直又於山外寨門搜斬一級諸亡命  
殊死走鹿星海胡震又追及之犁沉一艘生擒二  
醜斬首三級殘寇復走滿山洋二十四日癸未胡

震追至滿山復擊沉一艘生擒倭魁四名十六日  
乙酉又於懸山生擒二醜酋首法正才閭標一辛  
三郎徐四郎阮七郎陸佑勇諸軍所請降於是隻  
檣不返而賊部中之梟雄悉絕是月親督陸兵陸  
戰七捷殄滅羣寇舟中餘孽則又調水軍水戰五  
捷共水陸擒斬倭賊七百一十有七犁沉賊舟十  
有餘奪獲賊舟二十有一鹵獲刀銃旗鎗弓矢衣  
甲三千二百有奇釋俘擄男婦三千餘眾焚溺倭  
賊三千餘徒台境悉安是捷以不通分宜雖經題  
請未行覆勘亦不敘錄云

錄賞冲鋒功級并優恤死事家屬

是月海寇既平而論功行賞自不宜緩乃移文督  
府請給冲鋒楊世潮等二十二人冠帶候缺補哨  
以爲衆勸而朱珏之手刃七賊楊世潮之手刃五  
賊各給賞銀五十兩重二十兩銀牌各一面其陣  
亡陳文清等家屬各恤銀五十兩復請增募新兵  
二十而舊兵之有功者各簡任總哨頭目有差

呈請錄勸兵士

竊照每年功賞間及頭目而小兵徒懷觖望恩典  
或被生存而陣亡每致湮沒是以勇者扼腕而勝



心恒自阻也。今此旬日數捷，皆兵士齊心奮力所致。乞將陣亡者從重題恤，衝鋒者給與冠帶，去其錄敘頭目，假借總哨名色者，題准實授一職。庶三軍感奮而百戰不殆，敵愾愈勵而永保全捷矣。

附錄遊奇營哨隊兵夫俞世隆等稱說世隆等各於五月五日在白永洋與同右後中三營官兵戰捷。今蒙部院給賞，思比時首冲賊鋒，實二營當先奉令，不取財級，故世隆等得以乘勝協戰，斬獲頗多。情願共讓出數兩銀，四分之一與二營冲鋒兵勇充為酬勞之費，足徵感召之孚。

閏五月閩廣洞賊糾夥分劫流寇江西

廣之程鄉和平大埔等縣。閩之汀漳延邵等府與江西徑路相通。是月程鄉松源橋下劇寇蕭應金

陳九林朝曦何琪等及老舉大盜梁益謝世綱等糾合黨眾九千人分寇江西其由贛州羊角水堡入者徑抵萬安直犯太和副使汪公一中遇害仍延住月餘由原路大肆焚掠而去其寇吉安之永豐者傍石城瑞金一帶攻據東山突過廣昌由樂安抵永豐與前賊合黨攻永豐又攻新淦之永市鎮延住五十餘日仍自原路飽欲而去其自南豐入者寇宜黃破崇仁復轉宜黃仍由南豐而去六月二十七日江西又流寇一夥五百餘由崇義寇龍泉沖劫萬安太和永新廬陵等處及新淦之河

均分劫羣邑大肆剽掠

秋七月江西兵叛寇亂請援於浙

江右承平日久兵無紀律又加賊勢猖獗有袁三者結黨劫眾乘機作亂連破廣信之玉山永豐延住四十餘日自分水斬關而去是時流寇未息叛兵復作郡縣瓜殘瘡痍載道官兵縮首黎庶爭遁乃移檄浙江告急制府時二華譚公因外艱回宜黃數致書家嚴必求親將制府胡公因上疏簡家嚴爲帥部兵往剿之

八月召援江西條陳十事

前賊林朝曦等率眾萬餘人於是月四日突從廣昌沖入撫州境分眾畧地其由東西寇者以三千人破樂安由南源而寇者以三千人破宜黃由甘竹而寇者以三千人再破崇仁時三縣署印官樂安則主簿田膏宜黃則縣丞王元崇仁則縣丞劉廷厘俱抱印先逃賊遂據縣大震因流劫豐城之烏峰嶺臨江之梓樹鎮而在樂安者又移屯臨川之上頓在宜黃者又移屯臨川之青泥在崇仁者又移屯臨川之永清渡三面犄角逼近撫城勢甚危急官兵連戰失利千戶李瓊戰死致乘鄉金谿

南城進賢處處皆寇幸新中丞胡公自浙赴任帶  
浙兵千人至進賢徑趨撫州撫圍始解賊由南豐  
廣昌飽慾而去抵南城官兵敗輒典史林文檢較  
劉秉仁俱死又有廣昌賊首姚在峰等見林朝曦  
等富載而歸亦率眾三千自廣昌寇吉安襲太和  
轉萬安焚劫肆掠蔓禍廬陵富田守備任鑾力戰  
身亡是月十有八日也時上允制府之奏命家嚴  
將本部兵三千人會同紹興府通判吳公成器再  
募新兵八百名赴援因上兵機要事略云茲蒙調  
剿江西流寇鞠躬殫瘁分所自盡但維揚維荆山

河之形勝既殊而山寇海寇攻取之方畧亦異此  
行務求成功難以草率就事所有十議關係軍機  
利鈍必和於國然後可以出軍必和於軍然後可  
以出戰否則必致無成有負重委一謀必勝夫江  
西首相桑梓之地其寇乃福廣江贛四院所剿之  
寇有功易以上達無功易以取戾今遣兵往援必  
秋毫無犯而功超四省乃可塞責故兵務足數謀  
貴專一生兵既不可用雜兵亦不可遣雷遲延不  
得草率苟奉命倉皇胸中無一定見一旦直指客  
地賓主心懷矛盾吾恐着無先後謀非出於萬全

議擬參商難免咻於眾楚聖天子所托重者謂何  
本部院所專任者謂何此謀之不可不定也二請  
監軍夫烏傷士卒頗收實效者由連年平定島夷  
盡得夷技長短之弊苦思權宜之方乃創鴛鴦陣  
器械長短相參各有所制故能每戰必克我兵無  
損且熟諳斯中地形分合向往盡得其形狀故也  
今山寇性技大與倭異又當探情形審名實知其  
所短思其所長如我某器可當賊某器及戰鬪陣  
勢或厚薄緩急不同我更以何等陣法號令乃能  
取勝則先定法制而後權敵舉兵者誠當務之急

也此須到彼借重彼地有司方得其情今旣不知  
彼矣而在我之士情器習何以知其相當故職謂  
難收近效也又況置兵客地期功旦夕間進退機  
宜必陳兩院督調糧糗盡屬有司之參將官所能  
爲乎卽知彼知已恐亦不能百戰百勝矣爲今之  
計必得浙二司一員監之仍乞移文嚴責彼處兵  
備一心協力然後責有所歸官無僨事之虞食有  
所出兵免思歸之念若執烏傷累勝之兵而曰殺  
伐之術無分異地卽此徑往恐有所不能也三叻  
調度夫職參將也所征之寇四院之任也若使職



無所統轄犄角於四院獨往獨來以期成功於客  
地恐專成本部院之功彰彼四院之失誰能容之  
必將職托於一院專責調度成則同功敗則同咎  
庶利害攸關無牽制之失矣四鼓募兵夫義烏土  
著殺賊於台守家之役耳父往子來親戚相助其  
氣常壯一聞遠調江西多不願行蓋有身家門戶  
之累若不重慰其心奚以釋鄉思而作敵愾也故  
門庭之兵惟恐無根籍之繫而臨事逃避可憂遠  
戍之卒又恐有根籍之累而氣便消索不奮乞將  
七八九月工食借解義烏充散安家之用其新募

之兵亦照舊兵均給方得猛士召募到齊須合營  
訓練旬日悉知號令方可同發庶士心豫附而令  
出惟行兵精服習而軍威自肅不然經過騷擾怨  
聲滿道甚至大村強姓聚黨拒行者有之其時寸  
功未見而物議先騰咎將誰諉也五議兵數夫用  
兵最忌紛雜而山賊倭寇情狀不同且智力兩均  
奸巧百出宜無所不備故兵非素用不敢委心況  
幽徑僻路我兵非足調度不敢直入今除官生雜  
役旗鼓親兵外新舊實收戰兵非五千不可六明  
賞罰夫用兵者氣也鼓氣者賞罰也每臨敵奮氣

輕生以奉令者亦冀萬一之生希僥倖之利耳豈人人皆忠義輕生樂死者哉今江西變起倉卒軍務俱無定格其冲鋒斬馘之賞不有額數何以作生氣耶合無量賜成議或出於江西或出於浙江或論首功或論戰次況山賊與民同類何所取信尤易生忌謗則士氣墮而怨且叢矣又安望其後功耶計今似當以戰次爲額如某處賊約若干但能全勝則約以懸賞若干不必論其首功庶兵刃不及無辜而天地之和不干忌謗之口自杜矣七代信地夫赴援千里之外起發之途已久旣而到

彼偵邏敵情審察形勢或操易器械方得決戰況  
山賊有巢可恃出沒不常凱旋難擬儻信地有警  
進退兩難咎將誰屬縱一往成功疲勞已甚卽春  
汛得歸非有數日休養未可復用乞別委兵將一  
枝代職分任之責庶士心一其向往而地方自有  
專司矣八議主兵夫客兵遠臨必借嚮導本職部  
伍竝無江西土著其岐徑隘口必得土兵導引若  
不與職利害相聯孰肯爲職用命乞行彼處衙門  
凡本職兵到各衙門主兵俱聽選充嚮導不許阻  
撓其衛所武官軍兵亦聽酌量取用而全勝之算

我握矣九議進止夫山賊奸猾貌難別識除劄營對壘外必居城郭以休士氣以防不測一也其對敵之際若賊敗奔村落人家必用火攻或准火攻務殲賊而不計居民或禁焚燬務全居民而置逸賊徒二也江西地方之事職亦畧聞若不素定明議預請給照將來之禍有出于擊賊之外者乞行彼處兵道一一議定庶免臨機悞事也十期調發夫前議既定一面乞將所募新兵銀兩交付通判吳成器速往義烏募兵舊兵月糧一面解赴義烏縣貯庫聽職到彼給發職先赴台州選發器械而

後順路義烏以便催兵赴省庶先計後戰不難捲  
甲而趨卽後發迂途亦自先人而至也書上胡公  
善之卽以浙江兵備僉事徐公栻監軍以佐調度  
別駕吳公督軍以贊進止機宜云

九月進都指揮使仍賜白金文綺有差

制府胡公題台功疏畧云四十年四五月倭賊分  
犯台州水陸諸處台金嚴參將戚某共擒斬倭首  
一千四百二十六夷焚溺死者四千有餘身經百  
戰勇冠三軍持廉秉公而士心咸服令行禁止而  
軍容整齊執銳披堅見賊則輕身先進絕甘同苦

遇士則推腹不疑白水能以寡而敵多黎庶免荼  
毒之苦花街乃以全而取勝城隅獲安堵之休隨  
旌麾之所指卽捷報之連聞台民共倚爲長城東  
浙實資其保障功當首論破格優錄以風諸將者  
也合候命下將戚某重加陞級仍加賞賚庶功賞  
有章將士益修于勸而士心豫附王國永孚于休  
矣疏上上命實授都指揮使仍賜兼金二十兩大  
紅紵絲衣二襲

冬十月帥師援江西討流寇于上坊大克之

是月丁巳朔越三日己未誓師啟行自錢塘江發

舟邇富春逾桐江宿五里灘有語及嚴陵事者家  
嚴曰古來賢達何限沉淪者亦自不少使子陵不  
遇漢帝何能流聲今日哉我輩但求其在我而已  
名與貴則固有命也六日壬戌犒諭兵士九日乙  
丑指揮李超持二華譚公書來謂流寇一時飄至  
三縣皆殘在臨川者已出金谿在宜黃者充斥四  
境旣焚我居復及我廩先世所遺已幻作虛空世  
界不孝僅以身免避難撫城且踰兩月陳蔡滋味  
則備嘗之矣況兩出兵而皆不利甚至五六賊追  
殺數千官兵無一人敢反戈相向者因而賊勢日



合郡城孤危千百萬生靈若無生意忽聞暫借旌  
麾西江人士謹聲若雷但庠燄甚熾旌麾尙遠十  
三郡人士待公以更生者不啻倒縣第恐雄師將  
臨羣賊宵遁兵退復來自非大創難以了事今乘  
其聚而擊之此萬全之策也知公磊落奇偉急以  
救民爲心必不吝此巍巍功德故敢丐命于公萬  
代瞻仰在此一舉惟捲甲兼程從天而下則數萬  
之寇平於一旦麟閣之功垂之千載惟公是望也  
時將日晡諸兵帥謁見幕府天寒甚家嚴親酌觥  
飲之其夜月明如晝更餘泊西安沿涯多橘林諸

士無敢睨視者土人採以餽焉十一日丁卯抵常  
山自發舟至此計九晝夜皆順風沿途諸監司以  
土幣贖皆倍償之其厚往薄來類如此十四日庚  
午始陸行家嚴在前鋒以司進止吳公督後隊稽  
生事者臨敵則家嚴督調吳公策應務使萬人一  
心前後無二旌旗動止一如新書見者咸詫爲奇  
觀云家嚴曰此不愆于六步七步乃止齊焉之法  
蓋不止不齊君輩未知耳每出師衣甲跨馬如士  
卒裝又嘗徒步行不時微服馳入後營適偏裨有  
冠忠靖而乘輿者卽怒燬其輿每日啟行必先團

營而後魚貫宿處親派秋毫無犯民心咸悅十六日壬申宿信州皇華亭譚公復以書迎謂節鉞已入信州喜宜人更生且有日矣乃知爲有力者所奪東征西怨詎不信哉雖然彼乃癰疥之疾也一人國手當信宿奏效撫建之患則如病瘡時作時止大損元氣久則合而成疔自非盧扁不能療耳今賊屯廖坊已浹旬矣三五成羣焚掠四出莫之誰何雄兵一至當滅此朝食而後賊知懲創不然且飽欲以去江西之禍尙未有了期也正思告急于左右會當事者請公分兵二之可分與否則不

敢知但欲趨南豐則莫如宜黃便者從中驅出既足保民且尋間道邀之亦易成功第以神速爲貴耳西人仰浙兵如景星慶雲卽今殘寇尙在廖坊病者半脅從者半以明公勇畧此直囊中物耳時清流渠魁黎天明與弟天綱約會大帽山令部長劉相周金公往糾上杭邵武等處賊徒七千餘人于本月五日自火燒嶺入寇弋陽鉛山貴溪間每出掠以數百人共舁一大旗四繫曲鈎如布網狀衛以長矛鋒刃旣接則羅弇其兵以長矛擁入以故官兵兩戰不利諸當事縮首無敢遣一矢者遂

據貴溪之板橋江爲巢鉛山亦有數百江西中丞  
胡公松欲分一枝援鉛山大兵趨貴溪家嚴曰此  
非兵法也萬一風雨賊或變更則兵勢孤矣所謂  
分者正如率然救首救尾乃爲得計旣而謀報賊  
聞大兵入境殊有戒心果焚巢移屯上坊去弋陽  
七十里而壁外有馬鞍山峻嶺爲之隔絕內有金鷄  
高峰爲之遠瞭兼徑路崎嶇草木叢茂近巢四圍  
環以疊嶺恃險負眾嘗瞭我兵於二十里之外非  
乘夜進兵烏能有濟十八日自葛陽發舟過傍羅  
鉛山尹史應嶽迎告賊情兼送嚮道家嚴卽出邏

卒所圖地形而質政之遂宿河口十九日出首飾  
藏金二百以懸賞乃先遣衢兵余廷法等把截鉛  
山遙爲聲勢次以把總胡守仁哨官朱文林等部  
兵爲前鋒從石母嶺進以千戶胡宗周佐之把總  
吳惟忠陳大成等部兵分左右翼從雷打石進以  
武生高尙節佐之家嚴自督把總胡大受陳濠等  
各部爲中軍從雷打石抄路搗巢通判吳公率本  
部把總石青吏吳元等佐之督餉同知周公贊弋  
陽尹陳公仕貴溪署印同知王公時拱共領民兵  
協助約會二十日丙子登岸野屯至漏下二鼓乘

夜啣枚分進疾趨六十里直抵其巢陳大成部下  
前哨官陳子鑾先至遂以本哨二百人挺入賊巢  
其渠魁首張大旗統眾逆戰我兵遵令高呼脅從  
平民聽便投戈自散當陣釋去者千人一鼓而前  
斬其巨酋獲其蠶旗餘寇尙危戰會吳惟忠等分  
路統兵俱至乃併力奮擊自五鼓抵日中倏伏倏  
出凡五度鏖戰賊莫能支遂星散免匿復鼓師震  
士直追山顛以長矛前擊追剿十餘里賊皆肉袒  
面猗伏誅屍橫於野千百有奇計馘渠魁首四羣  
醜一百九十四級生擒十九俘焚燬於巢者無算

其賊魁各總大王并賊哨張旗頭俱俘獲無遺釋  
繫累男婦八百餘眾奪獲妖書簿票刀仗千有餘  
數比時首功者陳大成等陣亡者胡文忠等八人  
也其刀仗俱議給衝鋒爲賞時家嚴以不獲全功  
爲恨曰視花街白水遠不逮矣次日大閱呼沖鋒  
者以懸賞畀之而火其財貨衣物罪不如約者二  
十人而斬其尤者三人謂吳公曰予惡其氣不盈  
也其餘漏網亡命連夜奔竄雲際嶺出境而去正  
追勦間宜黃之報復急乃移兵西下賊亦遠遁弋

陽告甯



十一月江西平班師旋浙

初五日辛卯兵抵宜黃之廖坊賊聞兵至預遁出境前上坊殘寇知建昌無兵復自光澤縣由外流入水口以突犯計欲往樂安以趨湖西時中丞胡公以不分兵致有煩言家嚴不以介意第與葉山人涵講良知自如也翼辰赴建昌賊望風分竄半在棠陰半入宜黃乃令寫前行牌置總舖中賊偵者見牌走報賊眾遂反棠陰不敢過樂安入湖西仍轉原路遁南豐爲出境計初十日麾旌馳轂由譚坊過建昌趨南城追於際下督兵勦之賊徒聞

風膽落敗走新城乃提師尾之旧夜馳數百里比  
及洵溪雪霧交作山徑迷漫咫尺莫辨且鳥道叢  
林犬牙交錯兵皆魚貫官亦猿攀及轉戰蕪坊寇  
悉倒戈曳刃乘夜冒雨窮奔十六日壬寅漏初下  
追至合平紛解四散時尙有大埔木窖暨黃沙壩  
等處賊徒俱垂涎江西窺伺境上十聞浙兵之威  
裂膽驚魂引眾遠遁江右悉定遂旋師還浙十二  
月江西撫臣胡公松題上捷疏云閩廣之間盜賊  
如水惠廣其源汀邵其匯而總瀉于江西之湖東  
自閩五月起撫建之墟瀾漫潰決橫溢旁流且其

徒甚繁此去則彼來西沒而東出連破五城遍蹂  
四境近十月間忽從邵武等處突入貴溪鉛山弋  
陽宜黃分劫爲寇會浙江戚參將適引兵入境甫  
至弋陽遂奮勇鏖戰大致克捷已而新寇再集流  
襲建昌復不日破之追剿無遺實皆浙江參將戚  
某之功千里赴援刻期奏捷號令嚴明而部伍莫  
不用命威名震耀而盜賊因之褫魂竈壘如林秋  
毫無犯居民安堵行旅揚眉所當厚加賞賚者也  
疏上欽賞銀二十兩紵絲衣二襲是捷因論兵機  
與撫臣不合遂不錄士卒之功不給首級之賞雖

奉旨該部行催終未理也

戚少保年譜者編卷之二終

戚少保年譜

卷二

堅